

Duzvaiz

牛

贵港市覃塘区蒙公乡高占小学五年级 詹琼香

Bineix seizcin, daxboh cawx duz vaizdaeg ndeu dauqma. Duzvaiz ndang hungsang, daengx ndang ndaemndat, bizbwdbwd, doiq gau gozngwtngwt cap youq aen gyauej song mbiengj. Gij yienghcej de rengz lai lo.

Duz vaiz neix ak raixcaix. Gou baez daih' it bae langhvaiz, ngamq daj gwnz faex gej cag roengzdaej, duzvaiz sawqmwh dawz gyauej baez ngaem, ga laeng baez daemh, aen ndaeng "fw" sing ndeu, yiengq gou cung gvaqdaej, gou lau ndaej lienmuengz gveng diuz cag couh buet, gou itmienh daej itmienh hemq: "Daxboh vaiq di daeuj ha, duzvaiz daemj gou la!" Gou gaemz heiq ndeu buet bae gig gya, caeklaiq duzvaiz mbouj gyaep daej. Geijlai yungyiemj ha! Daeggo dingqny le ganj daej, hozndat naeuz: "Mbei lwnyaek, mbouj raen gvaq, yawj gou!" Daeggo itmienh gangj itmienh bae gaem cag duzvaiz, duzvaiz gojyienz dingqvah dwk gaen daeggo byaij. Gou mbouj fugheiq, gaen youq baihlaeng byaij, caj yawj "heiq ndei".

Seizneix, dangnaj byaij daej duz vaizlax ranz Lungzseiq, duzvaiz ranz gou byaengq lwgda hung, ngaem gyauej yiengq vaizlax cung bae, vaizlax mbouj vueng mbouj muengz ngaem gyauej, song duz vaiz gau doiq gau daemj hwnjdaej lo, duz lawz hix mbouj fug duz lawz. Doeklaeng, vaizlax doiqlaeng, duzvaiz ranz gou sikhaek gyaep hwnjbae, buek dai goed vaizlax. Daeggo ngeng ndang dwk buekmingh rag diuz cagvaiz, diuz cag haen dawz aen ndaeng vaiz beng mbeuj lo. Sawqmwh, duzvaiz ranz gou gau baihswix baez ngeng, cig coh vaizlax goed bae, hix dawz daeggo rag laemx gwnz namh bak saeg namh lo. Daeggo haujlai nanz cij naengh hwnjdaej, de yungh fwngz lumhlumh caekhaex hemqlanglang.

Daxboh daej lo. De hozndat ndaej nyinzhoz bongzbwdbwd, sikhaek dawz duzvaiz cug youq laj faex hung ndaetndaet bae, yienzhaeuh ndaw fwngz yaengx diuz bienneuz, laebdaeb fat caekhaex duzvaiz cib lai bien, duzvaiz bwnda yaep song sam baez, raemxda ndikbyoegbyoeg roengzdaej, gakbak mauh ok raemxmyaiz hausagsag. De ngeng da yawj gou mbat he, lumjbaenz gangj: "Bouxcaj iq, gouqgouq gou ba." Raen gou lwnqqlwnq yawj de, youh haenqrengz caengz gou da ndeu, gou sim siengj, de itdingh haemz gou lo.

Duz vaiz neix beizheiq mbouj ndei, hoeng dajcae guhhong yienghyeigh ndaej. Ngoenz daihngaih, daxboh yien de bae daengz henz naz, hawj de cang ek, bienvaiz yaengx youq gyang mbwn, cae couh beng bae lo. Namhnaz ndaemndatndat lumj haijlangh ityiengh youq baihlaeng duzvaiz fandoengh, mbouj geij nanz, moux naz ndeu couh cae sat lo.

Gyangaemh, gou cang mbei hung soengq nywjheu bae hawj duzvaiz, de gamjdoengh dwk yawj gou da ndeu, couh gaemz hung gaemz hung dwk gwn hwnjdaej. Gou aeu sauqbaet daej dawz ndang de sauq ndaej luemjyubyub, youh bekbek ndang de naeuz: "Vaiz ndei, gaej daemj vunz, lai cae naz, gou ngoenzngoenz soengq ndeigwn hawj mwngz."

Seizneix, de ngiengx gyauej hwnjdaej, ndaw ndaeng boq heiq fofu, diuzrieng baet bae baet dauq, gij yiengh angq raixcaix, gou rox ndaej de gyaep gou lo.

(指导老师:覃珍团)



Ndaw ranz daeggo ciengx duz ma ndeu. Duzma neix ndang longz diuz buh saek henjaz, maj miz doiq da hung baenqletlet he, diuz rieng hung ciengzseiz bi bae bi dauq, gij yiengh haenx gig veihvuj.

Moix baez gou bae ranz daeggo, yaek haeuj bakdou seiz, de couh raeuq dwk buet okdaej, baez raen dwg gou, couh yak bienq soh, "hwnghwng" song sing, nyounqyouq din gou, yienzhaeuh bi diuz rieng gaen youq baihlaeng gou, riengz gou byaij haeuj ndaw ranz bae. Gou caeuq daeggo doxdongx le, couh caeuq duzma guhcaemz lo. Gou aeu doxgaiq de gyaep gwn haenx bau hwnjdaej, de couh aj bak diuj hwnjdaej ciep doxgaiq gwn, itmienh gwn itmienh yungh ndang daej lad gou. Gou lij caeuq de baenq gien guhcaemz, gou baenq daengz baihlaeng yungh fwngz lumh diuz rieng de mbat ndeu, caiq buet, caiq lumh……De aj bak dwk, mbouj dingz riengz gou baenq gien. Gou buet baeg lo cij dingz roengzdaej, de hix

Duzma

狗

武鸣县仙湖镇中桥小学四(1)班 梁敬辉

baegfofo dwk iet yinx okdaej, maeuq dwk yawj gou, gij yiengh de mizyinx raixcaix.

Ngoenzlwenz gou youh bae ranz daeggo guhcaemz, caeuq duzma caemz yaep he le, gou couh caeuq daeggo itheij yawjsaw. Mbouj rox gvaq le geijlai nanz, sawqmwh daj baihrog cienz daej sing daej lwngyez, ciep dwk ma raeuq mbouj dingz. Gou caeuq daeggo sikhaek cuengq cek saw buet okbae. Cij raen duzma hung ndeu rig heuj aj bak yaengyaeng byaij gyawj henz ndang dahsau iq song sam bi ndeu, dahsau iq deng ma hung hwk lau dwk daejnga' nga hwnjdaej. Gou ganjvaiq buet gvaqbae umj dahsau iq deuz. Seizneix, duzma daeggo cingq yiengq ma hung raeuq, cij raen de "fw" sing ndeu, daihdamj buet gvaqbae, caeuq ma hung doxhaeb hwnjdaej, ma hung siengj mbouj daengz duzma beij de iq haujlai, gingqyienz yienghneix mbeilaux, hix lau geij faen, doxhaeb geij baez le couh najmongmet dwk buet deuz lo. Duzma daeggo yawj gij ngauez ma hung bae gyaep haenx, lij raeuq mbouj dingz, lumjbaenz naeuz: "Baezlaeng gou raen mwngz hangz lwngyez, itdingh mbouj cuengq gvaq mwngz!"

Yawjraen gij yiengh duzma hingzsaenz raixcaix, gou daj ndaw sim boiqfug de.

Duzgvi Coengmingz

机灵的小乌龟

上林县大丰镇皇周小学三年级二班 谭丽平

Ranz gou ciengx song duz gvi gig dwggayez, duz ndeu hung, duz ndeu iq, gou daegbied gyaep gyoengqde. Aen gyauej duzgvi dwg sam gak; fouq lwgda iq loh ok gij rongh; aen ndaeng de gig daegbied, mbouj miz byai ndaeng. Aen hoz de ndaej iet youh ndaej suk, miz seiz iek okbae roek caet lizmij. Gwnz ndang aemq aen hak lumj aen vanj hung nei, gig ndongj. Henz hak miz gij oen iq.

Duzgvi ngamq daengz ranz gou seiz mbouj gwn hix mbouj doengh, aen gyauej suk haeuj laj hak de, lumj hozndat nei. Gou gip dangqmaz, sawqmwh gou siengj daengz: Boh' au gai duzgvi haenx lumj naeuz gvaq cijaeu mwngz dawz cik dawh ndeu daej, dawz gijgwn cuengq youq gwnzde, duzgvi couh iet gyauej okdaej gwn. Gou anqciuq boh' au gangj haenx bae guh, dahraix, duzgvi iet gyauej okdaej gwn doxgaiq lo. Gvaq geij ngoenz le, duzgvi ciemhciemh sug gij vanzging neix, couh haicij hozdung lo.

Ngoenz ndeu, gou daegdingh dawz gyoengqde cuengq youq aen gang ndeu, yawj gyoengqde youh siengj guh gijmaz. Cijraen duzgvi hung ca mbouj geijlai ciemq aen gang liux bae, ciheij youq ndawde youz, duzgvi iq deng bik ndaej mbouj miz dieg youq. Duzgvi iq baez diuq, diuq daengz gwnz baihlaeng duzgvi hung bae, song aen



nyauij lumj gaem maenh aen ndang duzgvi hung nei, mboujlwnh duzgvi hung baenzlawz faet cungj faet mbouj ndaej okdaej! Duzgvi hung baegfofo lo, lumj dwg naeuz: "Mwngz caiq mbouj roengzdaej, gou couh hozndat lo!" Duzgvi iq lij mbouj doengh saekdi, lumj dwg naeuz: "Danghnaeuz mwngz hawj gaiq dieg ndeu hawj gou, gou sikhaek roengzdaej!" Duzgvi hung mboujmiz banhlap, cijndaej doenq aen ndang, hawj giz dieg ndeu hawj duzgvi iq. Yawjraen gij cingzgingj neix, gou nyaenx mbouj ndaej riu hwnjdaej, nyaenx mbouj ndaej dawz fuk veh neix veh roengzdaej.

Duzgvi iq geijlai coengmingz ha! Gou nyienh de caeux di majhung!

(指导老师:覃仲南)